

1 Juan

Juaña kasak ne kalta gaune zuñgajenapanaldiamak

Meja ai kalta gauwane: Duwe Jesúja 12 shaxaldixakuega aldén izhgajañguxa Juaña jalde kalta gauwane. Ega na Duwe Jesúja ají múldigaba guaxaldixa gaxanekue naña agatsé.

Mekuetshi kalta gauwane: Juaña aldén tunamak ne guashi Duwe Jesús ipananekekue jalde kalta kagakauwane. Aldéñki Asia baxe nahauxa Duwe ipananekekue aksaneshi izhone. Ai zhinik na eñgui baxe zaldakuetshi kalta gauwane ajañguxa (2.12-14).

Jinak ai kalta gauwane: Juaña naldi jinak jalde kalta gauwane ekí guaklde: “Maiñ ‘Duwe Jesúsiki Jatetshi Asukuága nazikuanamak nakldá’ jañgui ipanaminekuañ na jalde kalta ekí miñgakauwatokuge. Ekíki abisajañ izhoshiña izhogapanamine muldetua miñkualdiña mizhekualdaldiamak” (5.13). Ekí izhogakualdiamake Duwe Jesús shaldaki namaklde jañguakue, jian atshakuamak za atshiji, aldén zuñmenamak ataba atabañ ajañgual nogakue.

Ji, ji shalda guashi jalde kalta gaune:

1. Duwe Jesúsiki Saldiña netshi Jatetshi Múldigaba (1.1-4)
2. Duwe Jesús na, Jate na muldetua ishkaldaldi izhogakue (1.5–2.28)
3. Duwe Jesúsiki nekaldekuañki Jatetshi sukua kaldé (2.28–4.6)
4. Duwe ipanane mitsabé izhogakue (4.7–5.21)

Juaña kasak ne kalta gaune

Duwe Jesúsiki Saldiña netshi Jatetshi Múldigaba

1 ¹ Jalde miñkuzgauwatokugeki Saldiña netshi Jatetshi Múldigaba naldiña ne xalte. Eñki Duwe Jesúsiga, ega na Jateja guaká zuñwashekuiña aldunaxa abisajañ zunezhokshixa

2 ¹Shui sukuakuañ, sha atshabináldiamak na jalde kalta miñgakauwatokú. Naldatshak mieldeke sha atshañga guakualdiake, ezua zuñzukuakaki Saldiñga netshi Jate nugeñka zuñgiteñga. Eñki Duwe Jesú Zunekualkaga, aldéñki sha atshagálde, jian za izhuka.^l
²Akze, sha katshixa shalda guiyaba tuakue zuñgatsé nalgué, aldéñki zunesabiyaldiamak nauwitsaldí shuixal axaldán aké guane. Ekíki Jate sha katshixa zuñkabetaldiamak. Guatshak nauwitsaldí za ekí atshazháne, káguba zhekuauxa tsaldi ekí atshá guane nakldá.^m

Jateja guagamak atshakue

³Akze, Saldiñga netshi Jateja atshakue guagamak za axatshál nogakualdiák, ai zhinik na aldéñki “me ne” zuñwashék guane zuñkualdi izhogakualdixa. ⁴Azhi mieldeki amak axatshakí nogatuka ne jiaga “nas zúnake Jate ‘me ne’ nakué nakldá” nexaldiák, eñki naldagálde zukuaka naldi na, namaklde ni nauwa akualdagáldega ekí nexaldixa nakldá. ⁵Ekí ne, mieldeke Jateja ají múldigabak guagamak atshañkaldukake, namak giemi aldéñ izhgajañguak guildegakue zúnajañguaneñka zúnakldañkashá guane naldakualdixa. Ekí zhinik na, “Jateldi izhokuge shakldá” zuñwashék guaka.ⁿ ⁶Akze, mieldeke “agajuezha naldakí, eldi izhokuge nakldá” negakualdiake, ake, Duwe Jesú jai kagik izhonamakbé izhogakue zuñgatsaldashá.^o

⁷Shuikuañ, aiga na ezua atsha guakue, eñki zhualduxa ajañgual nogakue shalda miñgakauwaldikue. Eñki guiyaba abisa nukabíneki naldazhé. Eñki mauzeñga zalda naldatshak, kasak Duwe Jesú mipanatshak zhinik ai múldigaba nukapanaminamakga nzha.^p

⁸Naldatshak jiak, jalde atsha guakue miñgakaukugeki abisaga nakldá. Akze, Duwe jai kagik izhogatoguén ai guiyaba amak ibuakuá guanéñ na, nasuñ e ipanañkaldekuañki ekíga atshapánañkalde. Jinake naldakí. Aldunaxa tuañ zúnzeklde izhoxañkaldogué, Duwe kipanatshake tuañ zalda aguáñ zuñgabapanatshake, aldéñ muñshí zalda nahamakga aldunaxa muñshí zúnzegualdá guane nak.^q

⁹Ekí ne, mieldeki “nas zúnake aldunaxa muñshí netseklde nakldá” negatshak jiaga Duwe ipananekue aguldiyalga noxaldiák, eñki aldunaxa tuañ itsekldega nuxa naldaldixa.^r ¹⁰Akze, mieldeke Duwe ipanañkaldekuañgaba ajañgual nogakualdiák zúnake, aldunaxa muñshí zúnzekldega izhogakualdixa. Ekí kizhogatshakna, Jatetshi jiúñguldak zhinik ni ji zúnakbiñguaka naldazhaldixa.^s ¹¹Ne, mieldeki Duwe ipananekue aguldiyal noxaldiák zúnake, aldunaxa tuañ

^l 2.1 Alm 8.34 ^m 2.2 Jñ 11.51-52 ⁿ 2.5 Jñ 14.20-21,23; 15.14; 1Jñ 4.12 ^o 2.6 Jñ 13.15
^p 2.7 Lv 19.17-18; Mt 22.36-40; Jñ 13.34-35 ^q 2.8 Alm 13.12 ^r 2.9 1Jñ 4.20
^s 2.10 Jñ 8.12

itseklde izhoshiñga na, uba isaná guane jana “miya ga ni neyatokú”
akldegazháldixa nzha.^t

Kagik zalda alduna ikauwasé

12 Shui sukuakuañ,

Duwe Jesús mimitsaldí shuanéñ zhinik
Jate sha atshamine miñkabetá guane nak
ekí kalta miñkuzgauwatokuge.

13 Duwe ipanamine jatekue jana minekuañ,

Duwe Jesúki ni ji jiaga naldagá nogueñga zaldak
axabaldeshi naxabinogatshak muldetua “me ne” miñwashék
guane nak
ekí kalta miñkuzgauwatokuge.

Duwe ipanamine awawakue jana minekuañ,
sha atshátshi sáñkaldá jisék agubiyá guamine nak
ekí kalta miñkuzgauwatokuge.

Shui sukuakuañ,

Nauwijate muldetua “me ne” miñwashék guane nak
ni ekí kalta miñkuzgaurú.

14 Duwe ipanamine jatekue jana minekuañ,

Duwe Jesúki ni ji jiaga naldagá nogueñga zalda naldatshak,
e axabaldeshi naxabinogatshak muldetua “me ne” miñwashék
guane nak
ni ekí kalta miñkuzgaurú.

Duwe ipanamine awawakue jana minekuañ,

Duwek za kama gushi, abá naldakí agapa neyalga minogatshak,
Jatetshi múldigaba miñjuizha naldakí amak atshál za noshi,
sha atshátshi sáñkaldá jisék agubiyá guamine nak
ni ekí kalta miñkuzgaurú.^u

15 Ekí minakna maiñki Duwe ipanazhánekue janañga jika kagik zalda
za akzé jañgui alduna ikauwabináldi. Ni ekue sha ajanashiji ashekuamak
izhogakue itshanabináldi. Akze, mieldeke ekí mizhekualdaldixa miñnexaldíak,
Saldiñga netshi Jateki namak giemi izhgajañguabíne naldaldixa.^v 16 Jinake
naldakí. Saldiñga jai kagik zalda shane mikldexakí Jatek zhinik nagazhánekue
nak. Ejiékue na abuák sha atshindana mikzekájá miksane gamak mikldunká
za niji, jika mikldunakagaba matuñkákí mixaldaldakuegaba jañgui, jiñgaba
zhinik nuxa sekuazhikshiji mikzé mixajanaldíamak za niji. Ekí izhoxaki
jai kagik sha ajanashéñ zaldagaba nuxa nakldá.^w 17 Akze, kagiki zuxaitaté
nogamakga na, saldiñga eñ zalda, shane mikldexa juizhi zuxaitaté nuxa

^t 2.11 Pr 4.18-19; Jñ 12.35 ^u 2.13-14 Ep 6.10-14,17 ^v 2.15 Alm 12.2; Kls 3.1-4; St 4.4
^w 2.16 Alm 13.14; Tit 2.12

nakldók. Ekí ne, mieldekuañki Jate zunajañguamak axatshál kizhukak zunake e na izhoshiña kizhogataná nakldá.^x

Duwe akaldak aguldiñkakuek be axaldogakue

¹⁸Shui sukuakuañ, auxa zexaldieñ zexaldá na guapán. Akna ezua sigí Duwe Jesú akaldak aguldiña “auxa zegatshak naxaldixa niyó” nukaminamakga, kaiga míngaki matshuwi ekíga Duwe aguldiñkakue izhañká na akú. Ai zhinik na auxa zexaldá guxá zuñkualdashá.^y ¹⁹Ekí Duwe aguldiñkakueki nasuñ naña izhajuizhaldekakue nane. Naldatshak jiak namake Duwe iyapanazhánakue nalguakna nauwikenáñ zhinik agazaxaitanakue. Akze, nasuñ naña agatsekue nanaldíñki nasuñ naña abataldé. Nalgué jinake agazaxaitane naldakí. Aikueki ni ezua nasuñ na agatsekue naldazhé ne awatualdixa nak.^z

²⁰Naldatshak maiñ Jate miyaxazauwaldiamake Duwe Jesú Jatetshi giemi nejaña Jatetshi Alduna miñgenéñ zhinik na, namaklde miñkualdiña jiki namaklde, jiki naldagálde miñgabeyatuka miñkualdaka.^a ²¹Akna ekí kalta miñgakauwaldatshake Jate shalda namaklde miñsúñze mimajañguiñki miñgakauwakí. Akze, namaklde miñkuéñ zhinik na naldagálde shizhiyaga namakldek zhinik nagazháne miñkualdashá.

²²Guatshak ¿mielde shi naldagálde zukuashiña zukuak atshixa na? Eñki “Saldiña netshi Jateja ezua zunekualdal zuñgakaxaldixa guakldeki Duwe Jesúga naldagálde nakldá” guak atshixa. E na ezua sigí Duwe akaldak aguldiña janaña neshi na, “Jate na, Asukuá Duwe Jesú na, naldagálde nuxa ne nakldá” neka.^b ²³Mieldejañki “Duwe Jesúki Saldiña netshi Jatetshi Asukuága naldagálde nakldá” guashi iyapanazhékueki, ake, Ajate jiaga iyapanazháldi na etshi naldazháka. Akze, mieldeke “Duwe Jesúki Jatetshi Asukuága nakldá” guashi ipaná guañkaldekuañki, ake, Ajate jiaga ipani na, etshi nek guañkaldekue.^c

²⁴Akna kasak Duwek agapa neyabipaneni zhinik e shalda namaklde shi miñkaldiyane nukapanaminamak miñjuizha naldakí, namak za jañgualga nogatogakue. Ekí mizhekualdaldiakna agajuezha naldakí Jateldi, Asukuá Duweldi jiaga izhoxal minoxaldixa.^d ²⁵Ekí izhoxaki Duweja sakí zuñkatshaldixa zuñmene zuñkatshiji na, aldunaxa abisajañ izhoshiña zunehokshataná nakldá.^e

²⁶Ne, naldagálde shizhixakueki Duwetshi jiúñguldak zhinik mimejuldukshindana kakzegakna, be miyaxaldoxaldiamak na ekí miñgakauwatokú. ²⁷Akze, Jate miyaxazauwaldiamake Duwejaña

^x 2.17 2Kt 4.18 ^y 2.18 Mt 24.5; 2Ts 2.3-4; 1Jñ 4.3; Aux 13.1-8 ^z 2.19 Ajsh 20.30

^a 2.20 Jñ 14.26; 16.13; 1Kt 2.12-13; 1Jñ 2.27 ^b 2.22 1Jñ 4.3; 2Jñ 7; Jd 4 ^c 2.23 Jñ 5.23; 8.19; 14.7; 2Jñ 9 ^d 2.24 Jñ 14.23 ^e 2.25 Jñ 11.25-26; 17.3

Jatetshi Alduna miñgene miñkaldaldiña miñkaldé. Ejaña na auxaga shi miñkaldiyal nogatshak, namakldegaba za shi miñkaldixa, ni nauwa naldagálde shi miñkaldiyazhé. Akna jiaq mokue exa zhinik akldé ipa shi miñkaldiyakue miñgajuezhazhaldixa. Ekí nakna Jatetshi Aldunaja shi miñkaldiyanamak Duwek agajuezhala naldakí, eldi izhoxal minoxaldí.^f

Jatetshi sukuakuañki jian izhogakue

²⁸Kaigaki shui sukuakuañ, “Duwe Jesúldi izhoxal minoxaldí” mokue miñmeyaldikue. Ekíki aldéñ naldiña mokue nagatshak, zñizek naldakí, ni ji shalda jiwak zñizukuakí akldabigakualdiamak.^g ²⁹Akze, aldéñki jian izhogakuamak za izhuka miñkuahamakga na, ekí miñkualdaka: Mieldeke ekíga jian atshakuamak za katshixake, Jatejaña aldunaxa abisajañ zñnakukshane, etshi sukuakue nekalde.^h

3 ¹¡Tu guwíñ! ¡Jate mitsá atemajañ zñnajañguxaga na “nají sukua giemi nibaldá” zññkaldeká katuashá! Akze, asukuákue kaldahamak na kaldá. Naldatshak Duwe Jesú iyapanazhánekuejañki jinak nasñ Jatetshi sukuakue kaldé kagajienazhé naldakí. Saldiña netshi Jateki “me ne” kaksúñze nak.ⁱ ²Shuikuañ, au Jatetshi sukuakue giemi nek guáñkalde. Ne niuwizhíne sakí naldakualdixaki muldetua mu zññgisekuagá nogashá. Naldatshak ekí zññkué: Duwe Jesú mokue nagatshak zñnake, aldéñ sakí ne nahamak naldakualdixa. Jinake naldakí. Atshak aldéñ naldi muldetua agatsahauxabe tuakualdixa nak.^j ³Akna mieldeke ekí “Duwe janamé naldaldikue shakldá” zññneshi jiaktuwi kizhukake, aldéñ ni nauwa nusagatse axaldí agatsaldagálde izhogamakbe izhogakualdixa izhgakushi na, aldunaxa janshi ishkazguí, shanek agajué izhogakualdixa.^k ⁴Ne, mieldeki sha atshál za izhukaki Jateja jian izhogakue guiyabak guaká atshagábaki, kutám za atshixa. Akze, sha atshákí Jateja guagamak atshagába, ijulduni mual atshá nuxa ne.^l

⁵Naldatshak ekí miñkué: Duwe Jesúki sha atshá zñnguxal na kagik nakldane.^m Aldéñki ni nauwa sha atshagálde. ⁶Akna mieldeke Duweldi izhoxal za nogakualdiake, sha atshalga noxañkaldáaldixa. Ekí ne, mieldeki sha atshalga noxaldiake, eñki Duwe “me ne” ni nauwa aksúñzega naldaldixa nakldá.ⁿ

⁷Shui sukuakuañ, ni meja jalde shalda naldagálde nuxa namak ne mimajañgushazhaldi: Mieldeke jian atshakuamak za atshiji kizhukakuañ guana, Jate zñnatuñkaki Duwe jana janshizhe, jian izhogakuamak kizhuka naldakualdixa.^o ⁸Ne, mieldeki sha atshál izhukaki jisétshiga

^f 2.27 1Kt 2.10-13; 1Jñ 2.20 ^g 2.28 1Jñ 4.17 ^h 2.29 Ajsh 22.14; 1Jñ 3.7

ⁱ 3.1 Jñ 1.12; 15.19,21; 16.3; Ga 4.6-7 ^j 3.2 Jñ 17.24; Alm 8.29 ^k 3.3 2Kt 7.1;

2Pe 3.13-14 ^l 3.4 1S 15.22-23; 1Jñ 5.17 ^m 3.5 1S 53.5-6,11; Jñ 1.29 ⁿ 3.6 Alm 6.1-2;

1Jñ 2.4; 5.18 ^o 3.7 Alm 2.13; 1Jñ 2.29

naldaldixa. Jinake naldakí. Jiséki kasaxa zhinikga ekí sha atshál za izhoshi nagatuka nak. Akze, Jatetshi Asukuá Duwe Jesúki jisé sha zúnatshishixa akiwatiyal guana kagik nakldane.^p ⁹ Akna Jateja aldunaxa abisajañ zúnakukshi ají sukuakue zúnaldeksanekuañki sha atshalga noxañkaldáaldixa. Akze, Jatek zhinikga abisajañ kukañkalde, ajíkue zúnaldeksiñga zúnaldeksá guane nakna sha atshalga nogazhánazúnaka.^q ¹⁰ Ne, mieldeki jian atshakuamak atshál izhogazhéki Jatetshi sukua naldagálde. Ekíga na, mieldeki Duwe ipananekue izhgajañgual nogakí naldaldiake, ake, aiki Jatetshi sukua naldagálde naldaldixa. Ai zhinik na mieldeki namak giemi Jatetshi sukua ne, azhi mieldeki jisétshi nuxa ne tunazúnaka nakldá.^r

Zhualduxa ajañguakue

¹¹ Akze, ai múldigabaga na kasak Duwe Jesú mipangueni zhinik nukshi naxabinukaki ataba atabañ ajañgual za nogakue zúñgatsé.^s ¹² Ne, Kaiñja akaja aguldiyanamak nasúñgaba izhguldiyakue zúñgatsaldakí. Akze, Kaiñki jisé sha atshátshi sáñkaldatshi nalguamakga na, aldani giemi guaxa guanane. Aldéñki shane atshiji izhuka naldatshak, aldani zúnake atshakuamak jian atshiji izhuka nalguakna ekí aldani guaxanane.^t ¹³ Akna gajakuañ, Duwe iyapanazhánekuek ekibeñga miyaguldiyatshak, “jínák ekí naxajanká!” jañguabináldi.^u

¹⁴ Akze, aldunaldiñki shuañkalde jana nuxa izhoxañkaldogué, Duwe kipanatshake aldunaxa abisajañ zúnaldeksane. Sakí zhinik ekí kaldé zúñkualdaka naldakí. Duwek zhinik zhuakaja nekaldekuañgabaki ajañgual kizhogák. Ne mieldeki zújañguagába izhukaki aldunaldi shuanega naldaldixa.^v ¹⁵ Ekíga na, mieldeki Duwe ipananekue aguldiyal nukaki, káguba guaxa atshixá zhuxañga atshixa. Guatshak ekí miñkué: Mieldeki káguba guaxa atshixaki Jateja aldunaxa abisajañ kukshazháne, ni izhoshiñga izhokshazhé.^w

¹⁶ Akze, Duwe Jesúki zúnajañguiñgaba guñguakna zúnekualdaldiamak, nauwitsaldí shuixaldiamak aldéñgaba aké guane. Ekí zhinik na sakí namak giemi zújañguakue zúnatuñshá guane. Akna nasúñ jiaga amakbeñga, e ipanáñkalde zhuakaja nekaldekuañgaba ajañguakue zúñgatsé. Ekí aldén zúnajañguanamak agatsaldí ajañguiñga na, ekue shaldakí sakí zúñgatsexaldiake, azhi atshuake shuigakue jiaga naldaldiake, “amak ni atshaldikú” itshanakue zúñgatsé.^x ¹⁷ Ne, mieldeki izhó guashi jika auxaga axaldé naldatshak, Duwek zhinik akaja neklde

p 3.8 Gn 3.15; Jñ 8.44; Eb 2.14 q 3.9 1Jñ 5.18 r 3.10 Jñ 8.44; 1Jñ 2.29; 4.7 s 3.11 Jñ 13.34; 1Jñ 4.21; 2Jñ 5 t 3.12 Gn 4.4-8; Eb 11.4 u 3.13 Jñ 15.18-19; 17.14 v 3.14 Jñ 5.24; 13.35; 1Jñ 2.9-11 w 3.15 Mt 5.21-22; 1Jñ 4.20 x 3.16 Jñ 3.16; 15.13; Ep 5.2,25; 1Jñ 4.9-11

jika agajuezhi guaté tuatshak guañ jañguazháldi agaunegakí naldaldiake, ¿sakí shi Jate zujañguamakga zujañguxa naldaka na?^y ¹⁸ Akna, shuikuañ, egabá múldigabak za “majañguge nzhakú” negagába, namak giemi aldunaxa zhinik ajañgui, izhgaunexal kuiznoshí.^z

¹⁹ Ekí izhogakualdiák zhinik na, “Jate namakldetshi naugamakga aldéñki namaklde natuñshanamak izhokuge shakldá” zuñkualdaka. Ekí zhinik na zuñzek náaldaki axaldakldazunaka.^a ²⁰ Azhi atshuake nauwijí aldunajaña “sha atshuge shakldá” zuñmeyatshak jiaga axaldakldazunakaga. Jinake naldakí. Jatejañki auxaga akué naldi na, aldéñki sakí zuñnegatuka guashiñki zhakaldakga akué kaldák.^b

²¹ Shuikuañ, nauwijí aldunaja zuñgatsé ne zuñmeyakí naldaldiake, zuñzek náaldaki Jate axaldakldazunaka.^c ²² Amak axaldashi, ji akshishakualdiák amak zuñkatshaldixa. Jinake naldakí. Aldéñ atshakue guagamak axatshál noshi na, akldunamakgaba za axatshañkalduka nak.^d ²³ Akze, atshakue guakákí jalde: Aiki “Jatetshi Asukuá Duwe Jesúki nazikuanamak shakldá” jañguakue. Aiga na, Duweja sakí atshakue zuñmenamakga ataba atabañ ajañgual nogakue.^e ²⁴ Mieldeke Jateja atshakue guagamak axatshál nogakualdiakna, agajuezha naldakí aldéñldi izhogakualdixa, jiak aldéñ zhinik zunezhgajuekua naldakí nasuñldi izhoxaldixa. Miya zhinik aldéñki amak nasuñldi izhuka zuñkualdaka naldakí. Aiki ají Alduna zuñgenéñ zhinik nakldá.^f

Naldagálde shizhixakuek be axaldogakue

4 ¹ Shuikuañ, mieldejañki “Jatetshi Aldunajaña na ekí nazukuakshí” guashi shizhiyatshak, egabá “namak nukshí” jañguagábaki, axáñ misha ekí shizhiyatukaki Jatetshi Aldunajaña ekí guakshatuka, azhi eja ekí guakshakí nuka muldetua tuwi guajakue miñgatsaldaldixa. Jinake ekí miñmeyakí. Matshuwi nekueki naldagálde nuxa “naski Jatetshi múldigaba naldiña zuxaitshikuge nakldá” aldeshi, naldagálde shizhaldiji san san aldeyaté aldogák.^g ² Miya zhinik Jatetshi Aldunajaña aksanegamak guagatuka ne tunazunaka naldakí. Mieldejañki “Duwe Jesú Zunekualkaki kagik nagatshak káguba naldi ixagabaldeklamakga nakldá” guagatuka na Jatetshi Aldunaja aksanegamak ne tunazunaka.^h ³ Ne, mieldejañki “Duwe Jesúki káguba naldi ixagabaldegazháne nakldá” guagatukaki Jatetshi Aldunaja aksanegazhé tunazunaka. Eñki ezua sigí Duwe akaldak aguldiñkatshi aldunaja aksaneklde nuxa ekí nexaldixa. Akze, ega na “naxaldixa niyó” nukaminamakga, au kaiga míñgaki

y 3.17 Is 58.7; St 2.15-17 z 3.18 Ez 33.31; 1Pe 1.22 a 3.19 1Jñ 2.28 b 3.20 Sal 139; 1Kt 4.4; Eb 4.12-13 c 3.21 1Tm 1.19; Eb 10.22 d 3.22 Jñ 9.31; 15.7; St 5.16; 1Jñ 5.14 e 3.23 Mt 22.37-40; Jñ 6.29; 13.34; 1Jñ 3.11; 4.21 f 3.24 Jñ 14.23; 15.10; Alm 8.9; 1Jñ 4.13 g 4.1 Dt 13.1-4; Jer 29.8-9; Mt 24.24; 1Kt 14.29 h 4.2 1Kt 12.3; 1Jñ 5.1

anuñka e na agatsekueki naldagálde shizhaldiji san san abizhaldá na akú.ⁱ

⁴Shui sukuakuañ, maiñ zunake Jatetshi nek guamine nakna naldagálde shizhiyatukakuek agubiyamine. Sakí zhinik ekí agubiyamine naldakí.

Jatetshi Alduna maiñldiñga miñsaneshi izhukaki, jisé jai kagik Duwe iyapanazhánekuek aksaneká guashiñki zhakaldakga kama axaldé nak.^j

⁵Akze, naldagálde shizhixakueki Jate “me ne” kaksúñzaldi na, jai kagik zalda shi ishkaldixá nuxa shizhaldixa. Akna Jate aksúñzekuejañki “namak nukshí” ajañgui iyapanka.^k ⁶Ekí ne, nasuñ Jatetshi nekaldekuañ shi kizhiyatshak, mieldeki Jate “me ne” akuekuejañki zuñkaldukaji zuñkiyapanka. Ne, Jatetshi aldegazhánekueja zunake zuñkaldukazhaldi, zuñkiyapanazhé. Ekí zhinik na, mieldeki Jatetshi Alduna namaklde naldiñga neja aksaneshi shizhiyatuka, azhí mieldeki jiséjañga aksaneshi naldagálde nuxa namak jañgushiji shizhiyatuka ne muldetua katunazunaka nakldá.^l

Jateki zujañguxa nak ajañgual nogakue

⁷Shuikuañ, ataba atabañ ajañgual za kuiznoshí. Jinake naldakí. Saldiñga netshi Jateki zujañguá guakue na nahauxa netshi jatega nak. Akna mieldeke zujañgual kizhukake, Nauwijatejañga abisajañ zunakukshane, aldéñ “me ne” zuñkué.⁸ Ekí ne, mieldeki zujañgual izhogazhéki Jate “mega nzha” aksúñze. Jinake naldakí. Jateki naldiñga zujañguxa ne nak.^m

⁹Akze, Nauwijateki mitsá zunajañguxa ne ekí atshatshak guana zunatuñshane: Aiki Asukuá ezuamé axaldalgué jiaga jai kagik zuñgakaxane, ekíki eñkáñ zhinik abisajañ izhoshiñga zunezhokshaldiamak.ⁿ ¹⁰Guatshak namaklde zujañguaki ekí ne: Nasuñ Jate jañguañkalde naldagába, aldéñ zunajañguane guana namaklde zujañgua nakldá. Ekí zunajañgui na, sha katshixa shalda guiyaba tuakue zuñgatsalgué, zunesabiyaldiamak Asukuá shuixal zuñgakaxá. Ekíki Asukuá akeshi nauwitsaldí shuigatshake sha katshixa zuñkabetaldiamak.^o

¹¹Shuikuañ, Jateki ekí agatsaldiñga zunezhgajañguane nakna, nasuñ jiaga ataba atabañ ajañgual nogakue zuñgatsé.^p ¹²Guatshak Saldiñga netshi Jatega ni meja, ni mitsák ubak naldi atuazhé. Naldatshak jiaga nasuñki ataba atabañ ajañgual kaldogatshak, jiak aldéñki zunezhgajuekua naldakí nasuñldi izhogatshakna aldéñ zujañguak guildegakue zunajañguaneñka zunakldañkashá guane.^q

¹³¿Sakí zhinik shi nasuñki Jatek agajuezha naldakí eldi kizhuka naldatshak, jiak aldéñki nasuñldi izhuka ne zuñkualdaka na? Aiki

ⁱ 4.3 2Ts 2.6-7; 1Jñ 2.18 ^j 4.4 Jñ 10.29-30; 14.30; Ep 2.2 ^k 4.5 Jñ 3.31; 15.19 ^l 4.6 Jñ 8.47; 10.27; 14.17 ^m 4.8 Jer 31.3; Ep 2.4-5; 1Jñ 3.1; 4.16 ⁿ 4.9 Jñ 3.16; Alm 8.32; 1Jñ 3.16
^o 4.10 Jñ 15.16; Alm 5.10 ^p 4.11 Jñ 15.12,13; 1Jñ 3.16 ^q 4.12 Jñ 1.18; 1Tm 6.16; 1Jñ 4.20

ají Alduna zũngenén zhinik.^r ¹⁴Ekíga na, Jateja Asukuáki kágubak katshekuauxa zũnekualdal gaxanamakga ne tuñkaldamak nasũñ aldén zũnakaxanekuañki gakuaka.^s ¹⁵Akna mieldeke “Duwe Jesúki Jatetshi Asukuá nahamakga nakldá” guashi ipanañkaldeke, Jateki nasũñldi izhuka, jiak nasũñ zhinik aldénldi kizhuka zũñkué.^t ¹⁶Ekí Jateki mitsá zũnajañguxa zũñwashekldén zhinik na, “eñki najañgual nogamakga shakldá” alduna kishixa. Akze, Saldiñga netshi Jateki naldiñga zũjañguxa nakldá. Akna mieldekuañki aldén, ajíkuañ jañgual kizhukake, aldénldi kizhuka, jiak aldénki nasũñldi izhuka zũñkué.^u

¹⁷Ekí izhogakualdiakna aldénga zũjañguak guildegakue zũnajañguaneñka zũnakldañkashá guane naldakualdixa. Ekíga na, jai kagik kizhogeñga akldé akldéñga Asukuá Duwe Jesú janamé izhogakualdixa. Ekígaba izhogakualdiakna, niuwizhíne saldiñgak zũñgatsaldi azhi zũñgatsaldakí ne zũnatuakué ldiuwañ zegatshak, zũñzek náaldaki axaldagakualdixa.^v ¹⁸Akze, zũjañgua na, zhe mikzexa nañki izhgukuagazhé. Akna mieldeke Jateja zũjañguak guildegakue zũnajañguaneñka zũnakldañkashá guaneke, zhe mikzexaki zũñsanegaksá guane naldaldixa. Akze, jinake zhe mikzegakue naldakí. Aiki sha atshamalde guiyaba mawatuñshaldixa nak. Akna mieldeki zhe akzeshiñga izhukaki Jateja zũjañguak guildegakue jañguaneñka akldañkagáldega naldaldixa.^w

¹⁹Akze, Saldiñga netshi Jate aldén misha zũnezhgajañguanén zhinik na zũjañgual izhonazũnaka.^x ²⁰Naldatshak mieldeki “naski Jate izhgajañguge nakldá” negatshak Asukuá ipanane aguldiji izhoxaldiaké, naldagálde zukuaká nuxa naldaldixa. Akze, akldé jai niuwabak tuñká izhgajañguazháka naldaldiák, ¿sakí shi Jate tuazhé mñngaki izhgajañgualdixa na?^y ²¹Ne aldénga na ekí atsha guakue zũñmene: Mieldeke aldén za izhgajañgual kalduka nake, Asukuá ipananekue jiaga izhgajañgual nogakue.^z

Jatetshi Asukuá za alduna ishakue

5 ¹Mieldeke “Saldiñga netshi Jateja ezua zũnekualdal zũñgakaxaldixa guakldaneki Duwe Jesúga nakldá” jañgui ipanañkaldekuañ guana, Jateja abisajañ zũnakukshane, ají sukua giemikuegaba nekalde. Guatshak Nauwijate kizhgajañguxa kaldakna etshi sukua nekldekue jiaga kizhgajañguxa.^a ²Akze, Nauwijate namak giemi izhgajañgui, aldén atshakue guagamak atshiji kizhogén zhinik na, etshi sukua

^r 4.13 Jñ 14.16,20; 1Jñ 3.24 ^s 4.14 Jñ 1.14; 3.17; 1Jñ 1.1-2 ^t 4.15 Jñ 14.23; Alm 10.9; 1Jñ 5.1,5 ^u 4.16 1Jñ 3.24 ^v 4.17 St 2.13; 1Jñ 2.28 ^w 4.18 Alm 8.15 ^x 4.19 1Jñ 4.10
^y 4.20 1Jñ 2.9; 3.17; 4.12 ^z 4.21 Mt 22.37-40; Jñ 13.34; 14.15; 1Jñ 3.23 ^a 5.1 Jñ 1.12-13; 1Jñ 4.15

nekldekue jiaga kizhgajañguxa zuñkualdaka. ³ Akze, Saldiñga netshi Jate izhgajañguaki ekí ne: Aldéñ atshakue guagamak za atshá. Ai atsha guakue guakaki atsháasa jiba neki naldazhé.^b ⁴ Jinake naldakí. Mieldeke Jatejañga abisajañ zúnakukshanekuañki jai kagik zalda za jañguxakue ajanashamak atshakue zuñgasanegatshak jiaga, amak atshañkaldáaldixa nak. Miya zhinik ekí sha atshák agubiyazanaka naldakí. Duwe Jesú alduna kishéñ zhinik.^c ⁵ Akze, ¿mieldeke shi kagik sha atshák agubiyakualdixa na? Ezuañgaba “Duwe Jesúki Jatetshi Asukuága shakldá” jañgui alduna ishiji kizhukakuañ.^d

Duweki “me ne” zúnatuñshixakue

⁶ Akze, Duwe Jesúki zúnekualdal kagik nagueni ají jiba atshapanatshak nik ajaukshá.^e Ai za atshazhá, zúnekualdaldiamak abi akzildi shuizhá.^f Jatetshi Aldunaja guana ekí atshane shalda zúnatuñshi, “me ne” zúñwashekual za nuka. Jinake naldakí. Aldéñki naldiñga nahamakga, namaklde ne zúnatuñshixa nak.^g ⁷ Akze, Duwe namaklde ne zúnatuñshatukakueki maigua nekue. [Jékaldaxa izhukakueki Nauwijate, Duwe Jesúga Jatetshi Múldigaba, Jatetshi Alduna. Maigua aldaldatshak ezuameñga nekue.^h ⁸ Naldatshak jiak jai kagik jiaga maigua nañga.] Aikuega na, ezua agatsalda neki Jatetshi Alduna aldénga zúñgene. Mozhua agatsalda neki Duwe Jesú nik ajaukshane. Maigua agatsalda neki Duwe Jesú zúnekualdaldiamak abi akzildi shuane. Ai maigua aldaldatshak zhualduxa izhgakualdi aldoshi na, Duwe “me ne” shalda zúnatuñshatukakue.

⁹ Guatshak nasuñ kágubake ezuaja tunamak ne zúñmeyaldiake, “namak ni guak” jañgui kagipanka. Kágubakgaba jiaga ekí kishkatshixa nake, Saldiñga netshi Jateja Asukuá shaldaga akuahamak zúñmeñkáⁱ míñgaki akaldak akzé nak agipanakue naldashá.

¹⁰ Mieldeke Duwe Jesú Jatetshi Asukuá namak jañgui ipanañkaldeke, nauwijí aldunaldi “Jateja guakáki namak sha guak” jañgui, aik za kama gúxañkalde kalduka. Ekí ne, mieldejañki Jateja guaká agipanakí naldaldiake, naldagálde zukuaká janañga axazgualdixa. Jinake naldakí. Jatejañga Asukuá shalda akuahamak ne akbeyatshak jiaga, namak jañguagálde nak.^j

¹¹ Akze, Jateja jalde guana akuahamak ne zúñmeñka: Asukuá zúnekuane namak jañgui ipanañkaldekuañ za na abisajañ izhoshiñga zúneshokshapanane.^k ¹² Akna mieldeke Asukuá ipanañkaldekuañki

^b 5.3 Jñ 14.15; 1Jñ 4.21; 2Jñ 6 ^c 5.4 Jñ 16.33; Ep 6.16; 1Jñ 3.9; 4.4 ^d 5.5 1Jñ 4.15
^e 5.6 Mt 3.13-17; Ex 29.1-21 ^f 5.6 Is 53; Jñ 19.33-37 ^g 5.6 Jñ 14.26; 15.26; 1Kt 2.9-16;
 1Jñ 2.27 ^h 5.7 Dt 19.15; Jñ 1.1; 10.30; Aux 19.13 ⁱ 5.9 Mt 3.16-17; 17.5; Jñ 5.36-40;
 8.14-18 ^j 5.10 Jñ 3.33; Alm 8.16; 1Jñ 1.10 ^k 5.11 Jñ 1.4; 1Jñ 2.25; 4.9

abisajañ izhoshiñga kizhuka. Ekí ne, mieldejañki Asukuá ipanakí naldaldíak, e na izhoshiñga izhogazháka naldaldixa nzha.^l

Aldiwe kakkbene

¹³ Maiñ “Duwe Jesúki Jatetshi Asukuága nazikuanamak nakldá” jañgui ipanaminekuañ na jalde kalta ekí miñgakuwatokuge. Ekíki abisajañ izhoshiñga izhogapanamine muldetua miñkualdiñga mizhekualdaldiamak. [Ekíga na, abá naldakí “Jatetshi Asukuá Duwe Jesú nazikuanamak shakldá” alduna ishalga minoxaldiamak.]^m

¹⁴ Ekí zũnkualdi na, zũñzek naldakí Jatek axaldakldazunaka. Akze, aldéñ ji akshishakue zũnajañguamak akshishakualdiake, “naldukaldixa shakldá” zũñkué.ⁿ ¹⁵ Ji akshisháñkalde zũnaldukaldixa zũnkualdi na, ekí jiaga zũñkué: Ji akshisháñkaldeki amak zũñkatshá guanega naldaldixa.^o

¹⁶ Akna mitsake ezua Duwe ipanaminekuañga sha atshiji, ijuldunaté mitualdiake, e shalda Jatek akshishakue. Ekí akshishaminamak Jatek agakualdinatshake, ek agajué abá guagába, aldéñ nañga muldetua izhokshaldixa. Ai jiaga, Jatek agakualdinakakga sha atshane naldaldíak za na ekí Jatek akshishakue. Ne, ezua sha atshá Jatek agajué za izhoshiñga mezhokshakue atshaté mitualdiake, ai shaldaga Jatek akshishakueki miñmeyakí.^p ¹⁷ Akze, saldiñga kutám ne atshá guakueki Jatek sha axatshiji nuxa ne. Naldatshak sha atshá agakualdi guakueki amak magakualdinaldiake Jatek agajué za izhoshiñga nogakueñka mauldeyasé.^q

¹⁸ Ekí zũnkualdaka: Jateja abisajañ zũnakukshanekuañki sha atshál izhoxañkaldáaldixa. Akze, Jatetshi Asukuága numañ zũnatuwi izhogakna, sha atshátshi sáñkaldá jiséki sha zũnakuá akzegazháldixa.^r

¹⁹ Ekí jiaga zũñkué: Nasũñ Duwe Jesú ipanañkaldekuañki Jatetshi sukuakue nekalde. Ne saldiñga e iyapanazhánekueki jisé jai kagik sanegatukaja za kaksaneka.^s ²⁰ Ekí jiaga zũñkué: Duwe Jesú Jatetshi Asukuá giemiga zũnkaldaklde. Jinak zũnkaldaklde naldakí. Saldiñga netshi Jate nahamakga ne “me ne” muldetua zũngajeñguanéñ zhinik na, Jate na ishkalbaldexal izhogakualdixa nak. Jate namakldeldi ekí kizhogamakga na, Asukuá Duwe Jesúldi kizhuka. Duwega na Jate namaklde, abisajañ izhoshiñga mezhokshakue nakldá.^t

²¹ Shui sukuakuañ, Jatek mimagajuekuaka jigabá akldé agazukuxak agajué za noshi, be minoxaldí.^u

Ekíga shi naldí.

^l 5.12 Jñ 3.15-16,36; 5.24 ^m 5.13 Jñ 20.31; 1Jñ 1.1-2 ⁿ 5.14 Ep 3.12; 1Jñ 3.22

^o 5.15 Is 65.24 ^p 5.16 Job 42.8-9; Mt 12.31-32; Jñ 17.9; Eb 10.26-27 ^q 5.17 1Jñ 1.9; 3.4

^r 5.18 Jñ 10.27-29; Alm 8.38-39; 1Jñ 3.9 ^s 5.19 Jñ 12.31; 14.30; Ep 2.2 ^t 5.20 Jñ 1.14,18; 17.3; 1Jñ 5.10-12 ^u 5.21 1Kt 10.14